

Bosna i Hercegovina  
Brčko distrikt BiH  
URED-KANCELARIJA ZA REVIZIJU  
JAVNE UPRAVE I INSTITUCIJA  
u Brčko distriktu BiH



Босна и Херцеговина  
Брчко дистрикт БиХ  
КАНЦЕЛАРИЈА-УРЕД ЗА РЕВИЗИЈУ  
ЈАВНЕ УПРАВЕ И ИНСТИТУЦИЈА  
у Брчко дистрикту БиХ



---

Islahijet 8, telefon 049 218-220, faks 049 490-276  
Ислахијет 8, телефон 049 218-220, факс 049 490-276  
[www.revizija-bd.ba](http://www.revizija-bd.ba)

Broj: 01-02-03-13- 287/21  
R: 04-5; 09-5/21

**IZVJEŠTAJ O REVIZIJI FINANSIJSKOG POSLOVANJA**  
Kancelarije koordinatora Brčko distrikta BiH pri Vijeću ministara BiH  
za period 01.01.–31.12. 2020. godine

Brčko, jul 2021. godine

## SADRŽAJ

NEOVISNO REVIZORSKO MIŠLJENJE .....	3
1. REZIME DATIH PREPORUKA.....	5
2. UVOD .....	6
3. OPŠTI DIO .....	6
4. PREDMET, CILJ I OBIM REVIZIJE .....	7
5. OSVRT NA NALAZE I PREPORUKE IZ PRETHODNE REVIZIJE.....	7
6. NALAZI I PREPORUKE.....	8
6.1. RUKOVODSTVO I SISTEM INTERNIH KONTROLA.....	8
6.2. PLAN I REALIZACIJA PLANOM PREDVIĐENIH ZADATAKA.....	8
6.3. PLANIRANJE I IZVRŠENJE TEKUĆEG I KAPITALNOG BUDŽETA.....	9
6.4. POPIS IMOVINE I OBAVEZA .....	11
7. KOMENTAR.....	11
8. PRILOG .....	12

Bosna i Hercegovina  
Brčko distrikt BiH  
URED-KANCELARIJA ZA REVIZIJU  
JAVNE UPRAVE I INSTITUCIJA  
u Brčko distriktu BiH



Босна и Херцеговина  
Брчко дистрикт БиХ  
КАНЦЕЛАРИЈА-УРЕД ЗА РЕВИЗИЈУ  
ЈАВНЕ УПРАВЕ И ИНСТИТУЦИЈА  
у Брчко дистрикту БиХ



Islahijet 8, telefon 049 218-220, faks 049 490-276  
Ислахијет 8, телефон 049 218-220, факс 049 490-276  
[www.revizija-bd.ba](http://www.revizija-bd.ba)

## KANCELARIJA KOORDINATORA BRČKO DISTRIKTA BiH PRI VIJEĆU MINISTARA BiH

### GLAVNOM KOORDINATORU

### NEOVISNO REVIZORSKO MIŠLJENJE

#### Predmet revizije

Izvršili smo reviziju finansijskog poslovanja Kancelarije koordinatora Brčko distrikta BiH pri Vijeću ministara BiH (u daljem tekstu: Kancelarija), za period 1. januar – 31. decembar 2020. godine, te reviziju usklađenosti poslovanja s važećim zakonskim i drugim relevantnim propisima.

#### Odgovornost rukovodstva

Rukovodstvo je odgovorno za finansijsko poslovanje Kancelarije i usklađenost poslovanja s važećim zakonskim i drugim propisima, programom rada i odobrenim pozicijama budžeta. Ova odgovornost obuhvata: osmišljavanje, primjenu i održavanje internih kontrola koje su relevantne za sprečavanje i otkrivanje materijalno značajnih grešaka u finansijskom poslovanju, kao i primjerenost i ponašanje revidirane Kancelarije nad sredstvima i imovinom koja joj je data na upravljanje.

#### Odgovornost revizora

Naša odgovornost je da izrazimo mišljenje o finansijskim izvještajima na osnovu provedene revizije. Reviziju smo izvršili u skladu sa Zakonom o reviziji javne uprave i institucija u Brčko distriktu BiH („Službeni glasnik Brčko distrikta BiH“, broj: 18/18- prečišćeni tekst) i Odlukom o preuzimanju primjenjivanju i objavljivanju prevoda Okvira međunarodnih standarda VRI ("Službeni glasnik Brčko distrikta BiH", broj: 31/18). Ovi standardi nalažu da radimo u skladu s etičkim zahtjevima i da reviziju planiramo i izvršimo na način koji omogućava da se, u razumnoj mjeri, uvjerimo da finansijski izvještaji ne sadrže materijalno značajne pogrešne iskaze, te da je poslovanje usklađeno s važećim zakonskim i drugim relevantnim propisima.

Revizija uključuje sprovođenje postupaka u cilju pribavljanja revizorskih dokaza o usklađenosti finansijskog poslovanja sa zakonskim i drugim relevantnim propisima, odobrenim i izvršenim pozicijama budžeta i izvršavanje poslova iz svoje nadležnosti.

Izbor postupaka je zasnovan na revizorskom prosuđivanju, uključujući procjenu rizika nastanka materijalno značajnih grešaka u finansijskom poslovanju.

Prilikom procjene rizika, revizor razmatra interne kontrole koje su relevantne za prezentaciju finansijskog poslovanja, u cilju osmišljavanja revizorskih postupaka koji su odgovarajući u datim okolnostima i zadovoljavaju standarde revizije.

Smatramo da su pribavljeni revizorski dokazi dovoljni i odgovarajući i da obezbjeđuju osnovu za naše revizorsko mišljenje.

### **Pozitivno mišljenje**

Po našem mišljenju finansijsko poslovanje Kancelarije je tokom 2020. godine u svim materijalno značajnim aspektima usklađeno s važećom zakonskom regulativom, kao i planiranim pozicijama budžeta.

Zamjenici glavnog revizora

Amra Ilić, dipl. oec.

---

mr. sci. Savo Grujić, dipl. oec.

---

Glavni revizor

Nekir Suljagić, dipl. oec.

---

## 1. REZIME DATIH PREPORUKA

Izvršenom revizijom finansijskog poslovanja Kancelarije za 2020. godinu, konstatovali smo određeni broj propusta i nepravilnosti i radi otklanjanja istih, dali smo sljedeće preporuke:

*Potrebno je obezbijediti jačanje sistema interne kontrole prilikom utvrđivanja potrebe za angažmanom, te transparentnim odabirom pri angažovanju lica po ugovoru o posebnim poslovima.*

*Potrebno je poštovati odredbe Pravilnika o radu u dijelu zaključivanja ugovora za obavljanje poslova za koje nije predviđeno radno mjesto, kao i broja angažovanih izvršilaca.*

*Potrebno je odabir lica za obavljanje posebnih poslova vršiti na transparentan način.*

## **NALAZI I PREPORUKE IZVJEŠTAJA O OBAVLJENOJ REVIZIJI FINANSIJSKOG POSLOVANJA KANCELARIJE KOORDINATORA BRČKO DISTRIKTA BiH PRI VIJEĆU MINISTARA BiH ZA 2020. GODINU**

### **2. UVOD**

Revizija finansijskog poslovanja Kancelarije obavljena je na osnovu ovlaštenja datih Zakonom o reviziji javne uprave i institucija u Brčko distriktu BiH i drugim relevantnim propisima, kao i na osnovu Godišnjeg plana revizija.

### **3. OPŠTI DIO**

Kancelarija je osnovana 18. decembra 2005. godine potpisivanjem Sporazuma o uspostavljanju Kancelarije. Sporazum je potpisan između Vijeća ministara Bosne i Hercegovine i Brčko distrikta Bosne i Hercegovine.

Dana 04.04.2006. godine Nalogom supervizora za Brčko distrikt BiH, imenovana su lica za rad u Kancelariji, čime su stvorene pretpostavke za početak njenog rada. U skladu sa Zakonom o izmjenama i dopunama Zakona o javnoj upravi Brčko distrikta BiH („Službeni glasnik Brčko distrikta BiH“ broj 43/08) koordinator je imenovan na mandat od pet godina Odlukom o imenovanju broj: 01.10100DA-21/14 od 23. aprila 2014. godine.

Članom 50 Statuta Brčko distrikta Bosne i Hercegovine – prečišćeni tekst („Službeni glasnik Brčko distrikta BiH“, broj: 2/10) propisano je da je Kancelarija odgovorna za zastupanje interesa institucija Distrikta pred institucijama Bosne i Hercegovine.

Članom 27a Zakona o izmjenama i dopunama Zakona o Vijeću ministara Bosne i Hercegovine („Službeni glasnik Bosne i Hercegovine“ broj 76/07) definisano je da je Kancelarija nadležna da vrši sve aktivnosti s ciljem koordinacije rada Vijeća ministara i Brčko distrikta Bosne i Hercegovine, a u svrhu primjene Konačne arbitražne odluke za Brčko.

Istim zakonom je definisano da će Kancelarija imati sljedeće nadležnosti, prava i dužnosti:

1. da bude pravovremeno informisana o svim sjednicama Vijeća ministara;
2. da prisustvuje svim sjednicama Vijeća ministara, Odbora za unutrašnju politiku i Odbora za ekonomiju;
3. da, s ciljem realizacije poslova iz svoje nadležnosti, ima pristup svim materijalima, koji se pripremaju za sjednicu Vijeća ministara, materijalima koje Vijeće ministara prosljeđuje Parlamentarnoj skupštini Bosne i Hercegovine, kao i materijalima prosljeđenim Vijeću ministara od Parlamentarne skupštine Bosne i Hercegovine;
4. da, po ovlaštenju predsjedavajućeg Vijeća ministara i predsjedavajućih Odbora za unutrašnju politiku i Odbora za ekonomiju, učestvuje u raspravi na sjednicama Vijeća ministara i oba odbora o svim tačkama dnevnog reda koje se odnose na Brčko distrikt Bosne i Hercegovine, bez prava učešća u donošenju odluka;
5. da posredstvom predsjedavajućeg Vijeća ministara predlaže tačke dnevnog reda iz svoje nadležnosti za sjednice Vijeća ministara.

Članom 33 Zakona o izmjenama i dopunama Zakona o javnoj upravi Brčko distrikta Bosne i Hercegovine je definisano da je Kancelarija nadležna za:

1. zastupanje interesa Distrikta u Vijeću ministara BiH;
2. uspostavljanje i održavanje saradnje i koordinacije sa institucijama BiH, međunarodnim organizacijama, fondovima, ambasadama, kao i koordinaciju s nadležnim odjeljenjima Vlade radnim grupama i tijelima;
3. podnošenje izvještaja i predlaganje aktivnosti gradonačelniku i Vladi koji se odnose na koordinaciju i saradnju Distrikta sa Vijećem ministara BiH i drugim institucijama BiH;
4. i druge poslove po zahtjevu gradonačelnika i Vlade iz nadležnosti Kancelarije određene zakonom i drugim propisima.

Kancelarija trenutno broji pet (5) zaposlenih.

#### **4. PREDMET, CILJ I OBIM REVIZIJE**

**Predmet revizije** je finansijsko poslovanje Kancelarije za 2020. godinu, u dijelu planiranja i izvršenja budžeta, ocjene sistema internih kontrola, kao i usklađenost poslovanja iz svoje nadležnosti i ovlaštenjima sa zakonskim i drugim relevantnim propisima.

**Cilj revizije** finansijskog poslovanja Kancelarije je da omogući revizoru da na osnovu prikupljenih dokaza izrazi mišljenje o tome da li je finansijsko poslovanje obavljeno u skladu sa zakonskim važećim propisima, kao i primjereno ponašanje rukovodioca Kancelarije nad sredstvima i imovinom Brčko distrikta BiH. Pored toga revizija je planirana i izvršena sa ciljem pribavljanja realnog osnova za ocjenu da li su preduzete sve mjere za namjensko trošenje budžetskih sredstava za svrhe za koje je dato ovlaštenje donošenjem budžeta, te davanja preporuka za dalji rad sa posebnim naglaskom na što efikasniju zaštitu javne imovine i ekonomično trošenje javnih sredstava putem jačanja internih kontrola.

**Obim revizije** je utvrđen internim planskim dokumentima revizije finansijskog poslovanja za 2020. godinu.

S obzirom da se revizija obavlja provjerama na bazi uzorka i da postoje inherentna ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške mogu ostati neotkrivene.

#### **5. OSVRT NA NALAZE I PREPORUKE IZ PRETHODNE REVIZIJE**

Kancelarija za reviziju javne uprave i institucija u Brčko distriktu BiH izvršila je reviziju finansijskog poslovanja Kancelarije za 2019. godinu i dostavila konačan izvještaj, u kojem su date odgovarajuće preporuke za otklanjanje utvrđenih nepravilnosti.

Kancelarija je sačinila Akcioni plan za otklanjanje nedostataka po revizorskom izvještaju za period 01.01.- 31.12.2019. godinu broj: broj: 17-05-88/20 od 8.7.2020. godine (u daljem tekstu: Akcioni plan), i isti je dostavljen Kancelariji za reviziju javne uprave i institucija u Brčko distriktu BiH, u roku od 30 dana kako je i propisano odredbama člana 17 stav 3 Zakona o reviziji javne uprave i institucija u Brčko distriktu BiH.

Osvrtom na preporuke date u Izvještaju o obavljenoj reviziji za prethodnu godinu, te uvidom u preduzete aktivnosti utvrdili smo slijedeće:

- **Kancelarija je provela preporuke koje se odnose na:**
  - Jačanje internih kontrola pri planiranju budžeta na poziciji pripadajućih poreza i doprinosa na naknade plata po osnovu minulog rada.
  - Planiranje pripadajućih poreza i doprinosa po osnovu minulog rada pri planiranju budžeta.

## 6. NALAZI I PREPORUKE

### 6.1. RUKOVODSTVO I SISTEM INTERNIH KONTROLA

Revizija obuhvata ocjenu sistema internih kontrola, s naglaskom na funkcionisanje internih kontrola kroz realizaciju programa rada, planiranja i izvršenja budžeta, te usklađenost poslovanja sa zakonskim i podzakonskim aktima.

Kancelarijom rukovodi koordinator. Odgovornost i ovlaštenja zaposlenih su utvrđene Organizacionim planom. Za obavljanje poslova iz nadležnosti kancelarije sistematizovana su radna mjesta: pomoćnik koordinatora za privredna i fiskalna pitanja, pomoćnik koordinatora za pitanja iz oblasti Ustava, Statuta, zakonodavstva i pravnih poslova, pomoćnik koordinatora za politička i građanska pitanja i tehnički sekretar. Sve pozicije su popunjene.

Na osnovu provedene revizije značajnih procesa poslovanja izvršili smo procjenu uspostavljanja, funkcionisanja i nadzora sistema internih kontrola.

Slabosti internih kontrola se ogledaju u nepoštivanju Pravilnika o radu u dijelu zaključivanja ugovora za obavljanje poslova za koje nije predviđeno radno mjesto, te netransparentnog odabira lica za obavljanje posebnih poslova.

***Potrebno je obezbijediti jačanje sistema interne kontrole prilikom utvrđivanja potrebe za angažmanom, te transparentnim odabirom pri angažovanju lica po ugovoru o posebnim poslovima.***

### 6.2. PLAN I REALIZACIJA PLANOM PREDVIĐENIH ZADATAKA

Članom 58 Statuta Brčko distrikta BiH utvrđena je obaveza podnošenja Skupštini Brčko distrikta BiH godišnjeg izvještaja o radu Vlade Distrikta i programa rada za narednu godinu na kraju svake kalendarske godine. Kancelarija je Program rada za 2020. godinu bazirala na osam ciljeva sa opisanim planiranim aktivnostima.

Plan rada za 2020. godinu je sačinjen 18.10.2019. godine i dostavljen glavnom koordinatoru Vlade Brčko distrikta BiH.

Kancelarija je izradila Izvještaj o radu za 2020. godinu i isti je 25.11.2020. godine dostavila glavnom koordinatoru Vlade Distrikta.



Izveštaj o radu Kancelarije za 2020. godinu sadrži podatke o realizaciji planiranih ciljeva i realizovanih aktivnosti iz Programa rada. Planirane aktivnosti realizovane u skladu sa Programom rada Kancelarije.

### **6.3. PLANIRANJE I IZVRŠENJE TEKUĆEG I KAPITALNOG BUDŽETA**

Tekući izdaci Kancelarije za 2020. godinu odobreni su u iznosu od **287.043,84** KM, a izvršeni u iznosu od **262.215,20** KM ili **91,35%**. (tabela broj 1 u prilogu Izveštaja).

#### **Bruto plate i naknade**

Sredstva za bruto plate i naknade odobrena su u iznosu od 192.749,64 KM, a izvršena u iznosu od 185.860,45 KM ili 96,43 %.

#### **Naknada troškova zaposlenih**

Sredstva za naknade troškova zaposlenih odobrena su u iznosu od 65.215,00 KM, a izvršena u iznosu od 54.931,34 KM ili 84,23% i odnose se na isplatu naknada za odvojeni život, otpremnine zbog odlaska u penziju i naknade za slučaj smrti.

Navedene isplate su izvršene u skladu sa članom 51 Zakona o državnoj službi u organima javne uprave Brčko distrikta BiH, kojim je regulisano da se za obavljanje poslova odnosno za premještaj u mjesto rada van Brčko distrikta BiH obezbjeđuje naknada za odgovarajući smještaj, troškove odvojenog života od porodice i troškove putovanja u mjesto stanovanja porodice i članovima 24 i 25 Zakona o platama i naknadama u organima javne uprave i institucijama Brčko distrikta BiH, kojim je regulisana isplata otpremnine zbog sticanja uslova za odlazak u penziju i jednokratne novčane pomoći zbog smrtnog slučaja u porodici.

#### **Doprinosi na teret poslodavca**

Doprinosi na teret poslodavca odobreni su u iznosu od 6.012,20 KM, a izvršeni u iznosu od 4.616,63 KM ili 76,79 %.

#### **Putni troškovi**

Izdaci za putne troškove odobreni su u iznosu od 2.400,00 KM, a izvršeni u iznosu od 1.848,04 KM ili 77,00%.

#### **Nabavka materijala**

Izdaci za nabavku materijala i sitnog inventara odobreni su u iznosu od 400,00 KM, a izvršeni u iznosu od 155,04 KM ili 38,76%. Sredstva su realizovana u navedenom iznosu jer je štampanje materijala Kancelarije obezbijeđeno u Savjetu ministara BiH zbog čega nije vršena nabavka tonera i papira.

#### **Izdaci za usluge prevoza i goriva**

Izdaci za usluge prevoza i goriva odobreni su u iznosu od 8.990,00 KM, a izvršeni u iznosu od 5.025,14 KM ili 55,90 %, Sredstva nisu realizovana u planiranom iznosu zbog smanjenog obima putovanja usljed epidemije izazvane korona virusom, kao i zbog manje cijene dizel goriva.

### **Izdaci za iznajmljivanje imovine i opreme**

Izdaci za iznajmljivanje imovine i opreme odobreni su u iznosu od 120,00 KM za plaćanje parkiranja vozila. Izdaci nisu izvršeni jer je parkiranje osigurano od strane Vijeća ministara BiH.

### **Izdaci za tekuće održavanje**

Izdaci za tekuće održavanje odobreni u iznosu 4.430,00 KM, a izvršeni u iznosu 3.742,02 KM ili 84,47%. Od navedenog iznosa se 1.263,52 KM odnosi na materijal za popravku i održavanje vozila, a 2.478,50 KM na usluge popravka i održavanja vozila.

### **Izdaci osiguranja i bankarske usluge**

Izdaci za osiguranje odobreni su u iznosu od 1.200,00 KM, a izvršeni u iznosu od 1.029,66 KM ili 85,81%, odnose se na osiguranje vozila u iznosu od 811,86 KM i 217,80 KM na osiguranje zaposlenih.

### **Ugovorene usluge**

Izdaci za ugovorene usluge odobreni su u iznosu od 5.527,00 KM, a izvršeni u iznosu od 5.007,190 KM ili 90,60%. Izdaci se odnose na: Reklamni materijal i poklone 187,08 KM, kotizacije za učestvovanje na seminarima 1.200,00 KM, privremene i povremene poslove, ugovore o djelu i komisije 3.503,41 KM i učlanjivanje tri motorna vozila u BIHAMK za 2020/2021. godinu 116,70 KM.

Članom 13 Pravilnika o radu službenika i namještenika u organima javne uprave Brčko distrikta BiH („Službeni glasnik Brčko distrikta BiH“ broj: 17/15, 12/17, 36/20 i 4/21) propisano je da se rad u organima javne uprave može obavljati angažovanjem lica radi obavljanja posebnih poslova za koje ne postoje predviđena radna mjesta. Propisano je i da rukovodilac organa javne uprave u toku kalendarske godine ne može angažovati više od 10% lica u odnosu na broj zaposlenih, a izuzetno, na obrazloženi prijedlog rukovodioca, u izuzetnim slučajevima Vlada može da odobri angažovanje više od 10% lica u odnosu na broj zaposlenih.

Kancelarija je na osnovu Odluke Vlade o davanju saglasnosti angažovala jedno lice (SSS) za obavljanje posebnih poslova. Ugovor o obavljanju posebnih poslova je zaključen na period od 27. 1. - 25.5.2020. godine i u istom je navedeno da se ugovor zaključuje za obavljanje poslova za koje ne postoji predviđeno radno mjesto.

Uvidom u obrazloženje prijedloga za angažovanje izvršilaca za obavljanje posebnih poslova, kao i opis poslova u Ugovoru, utvrđeno je da se ugovor odnosi na obavljanje redovnih poslova u Kancelariji a ne o posebnim poslovima.

Kancelarija je u 2020. godini 4 mjeseca angažovala jedno lice za obavljanje posebnih poslova, za koji je isplaćena naknada u ukupnom iznosu od 3.503,41 KM. Nismo se uvjerali da poslovi navedeni u ugovoru nisu predviđeni u opisu radnih zadataka zaposlenih u Kancelariji. Obzirom da Kancelarija ima 5 zaposlenih angažovanje jednog lica je više od 10% u odnosu na broj zaposlenih. Vlada nije, na obrazloženi prijedlog, u izuzetnim slučajevima, odobrila angažovanje više od 10% lica u odnosu na broj zaposlenih. Nisu nam predočeni dokazi da je odabir lica za obavljanje posebnih poslova izvršen na transparentan i zainteresovanim licima dostupan način.

***Potrebno je poštovati odredbe Pravilnika o radu u dijelu zaključivanja ugovora za obavljanje poslova za koje nije predviđeno radno mjesto, kao i broja angažovanih izvršilaca.***

***Potrebno je odabir lica za obavljanje posebnih poslova vršiti na transparentan način.***

## **Kapitalni budžet**

Odobreni kapitalni budžet za 2020. godinu u iznosu od 3.000,00 KM, namijenjen je za nabavku stalnih sredstava, odnosno opreme. Sredstva nisu realizovana, jer pokrenuta zajednička nabavka na nivou Distrikta, nije okončana do kraja 2020. godine.

### **6.4. POPIS IMOVINE I OBAVEZA**

Popisna Komisija Kancelarije je imenovana Odlukom koordinatora broj: 17-05-146/20 od 14.10.2020.godine. Članom 7 stav 1 tačka a Uputstva o radu popisnih komisija i obavljanju popisa sredstava, potraživanja i obaveza („Službeni glasnik Brčko distrikta BiH“, broj: 30/08) regulisano je da je Popisna komisija Kancelarije dužna izvršiti popis stalnih sredstava, sitnog inventara i zaliha materijala i dostaviti isti Centralnoj popisnoj komisiji i Trezoru najkasnije do 15. 01. tekuće godine.

Popisna komisija Kancelarije je, u skladu sa odredbama navedenog Uputstva, predala usaglašene popisne liste 11.1.2021. godine.

Popisna komisija za popis sredstava, potraživanja i obaveza Kancelarije koordinatora Brčko distrikta BiH u Vijeću ministara BiH konstatovala je da je knjigovodstveno stanje stalnih sredstava jednako stanju po popisu u ukupnom iznosu od 109.311,65 KM (kompjuterska oprema u iznosu od 17.873,98 KM i motorna vozila u iznosu 91.437,67 KM) i da nema prijedloga za otpis stalnih sredstava. Komisija je popisala sitan inventar i automobilske gume u upotrebi i konstatovala da je knjigovodstveno stanje jednako stanju po popisu u ukupnom iznosu od 3.565,94 KM i predložila Centralnoj popisnoj komisiji otpis sitnog inventara ( fiksni telefoni i kasa za novac) i automobilskih guma u iznosu od 1.326,85 KM.

## **7. KOMENTAR**

Kancelariji je uručen Nacrt Izvještaja o reviziji finansijskog poslovanja za 2020. godinu broj: 01-02-03-13- 236/21 na razmatranje i dostavljanje eventualnih novih dokaza i komentara na nalaze revizije.

U ostavljenom roku od 15 dana, Kancelarija se nije očitovala, te stoga dostavljeni Nacrt predstavlja konačan Izvještaj o reviziji finansijskog poslovanja za 2020. godinu.

Tim za reviziju

---

Envera Imamović, dipl. oec.

---

Tatjana Pavlović Klašnić, dipl. iur.

## **8. PRILOG**

Struktura planiranih i izvršenih tekućih i kapitalnih izdataka za 2020. godinu, po pozicijama Kancelarije, prikazana je u sljedećoj tabeli:

Tabela broj 1

Ekon. kod	Naziv ekonomskog koda	Ostvareno 2019.	Odobreni budžet	Izvršenje 2020.	% 5/3	% 5/4
1	2	3	4	5	6	7
<b>611000</b>	<b>Plaće i naknade troškova zaposlenih</b>	<b>228.928,78</b>	<b>257.964,64</b>	<b>240.791,48</b>	<b>105,18</b>	<b>93,34</b>
611100	Bruto plaće i naknade	163.212,44	192.749,64	185.860,45	113,88	96,43
611200	Naknade zaposlenim	65.716,34	65.215,00	54.931,03	83,59	84,23
<b>612100</b>	<b>Doprinosi na teret poslodavca</b>	<b>4.464,18</b>	<b>6.012,20</b>	<b>4.616,63</b>	<b>103,41</b>	<b>76,79</b>
<b>613000</b>	<b>Izdaci za materijal i usluge</b>	<b>12.802,98</b>	<b>23.067,00</b>	<b>16.806,95</b>	<b>131,27</b>	<b>72,86</b>
613100	Putni troškovi	1.560,00	2.400,00	1.848,04	118,46	77,00
613400	Nabavka materijala	298,48	400,00	155,04	51,94	38,76
613500	Izdaci za usluge prevoza i goriva	6.566,70	8.990,00	5.025,00	76,52	55,90
613600	Unajmljivanje imovine i opreme	0	120,00	0	0,00	0,00
613700	Izdaci za tekuće održavanje	2.209,90	4.430,00	3.742,02	169,33	84,47
613800	Izdaci za osig., bank. usluge i usluge platnog prometa	1.111,00	1.200,00	1.029,66	92,68	85,81
613900	Ugovorene usluge	1.056,90	5.527,00	5.007,19	473,76	90,60
<b>600000</b>	<b>Ukupno tekući izdaci</b>	<b>246.195,94</b>	<b>287.043,84</b>	<b>262.215,06</b>	<b>106,51</b>	<b>91,35</b>
<b>820000</b>	<b>Kapitalni izdaci (za nabavku st.sr. otpreme)</b>	<b>0</b>	<b>3.000,00</b>	<b>0</b>	<b>0,00</b>	<b>0,00</b>
	<b>Ukupna budžet (tekući i kapitalni)</b>	<b>246.195,94</b>	<b>290.043,84</b>	<b>262.215,06</b>	<b>106,51</b>	<b>90,41</b>

Ured - Kancelarija za reviziju javne uprave i institucija u Brčko distriktu BiH

Kancelarija koordinatora Brčko distrikta BiH pri Vijeću ministara BiH